

[旧版文章](#)[天人古今](#)

古今通论  
古代通论  
世界史论  
当代三农  
现实问题  
旁通类鉴

[先秦史论](#)

先秦通论  
原始经济  
文明起源  
夏商西周  
春秋战国

[汉唐史论](#)

汉唐通论  
战国秦汉  
秦国秦代  
西汉东汉  
魏晋南北朝  
隋唐五代

[宋元史论](#)

宋元通论  
唐宋通论  
北宋南宋  
辽金西夏  
蒙元史论

[明清史论](#)

明清通论  
明代通论  
明中后期  
清代通论  
清代前期

[近代史论](#)

近代通论  
清代晚期  
民国通论  
民国初年  
国民政府  
红色区域

[现代史论](#)

近世通论  
现代通论  
前十七年  
文革时期  
改革开放

[学科春秋](#)

学科发展  
专题述评  
年度述评  
学人学术  
学者小档

[理论方法](#)

史观史法

[国学网](#)——[中国经济史论坛](#) / [池月山云](#) / [诗词诗话](#) / [《翰苑一室》](#) / [初学集·七言律诗 \(2\)](#)

### 初学集·七言律诗 (2)

2006-02-22 吴慧 作者提供 点击: 459

#### 初学集·七言律诗 (2)

## 初学集·七言律诗 (2)

### ——《翰苑一室》 (7)

吴慧

#### 河山篇 共十六首

#### 河 山 四首，次韵 1944年冬

万里河山入梦遥，是谁望气立长宵？星移劫换壶中日，月落魂迴枕上潮。风管自吹悲地裂，虎韬何计破天骄？书生不向沙场死，空任朱颜镜里凋。

苦寒春信觉非遥，强忍支离坐凍宵。国破有民皆似溺，陆沈无泪不如潮。风腥深莽豺虎喜，雨血平芜鹰犬骄。最是飘摇白门柳，未经霜露望秋凋。

沉史风高迹未遥，长吟击缶度清宵。无多短景难留日，有限微波不起潮。金谷许拼千日醉，冰山能恃几时骄？此心应自盟松柏，肯共群芳一例凋？

几人起舞壮心遥，亦是鸡鸣风雨宵。岂有戈挥沧海日？宁无弩射浙江潮。难降须看民同忤，必败未闻兵不骄。绝似槿花红一角，朝荣可免晚来凋？

#### 重 阳 1944年

满城风雨正重阳，枫老吴江鸥梦凉。釀菊延年非我事，佩萸避地更何方。白衣自许心原赤，皂帽应羞发未苍！闻道辽庭今射虎，飞觞分霁一时狂。

#### 春 阴 1945年

春阴十日太无端，剪剪东风送晓寒。堪惜年华随水逝，许分心事到花残。天边烽燧能高枕？雾里江山莫倚栏。纵得阳和亦何喜，嗟予弱冠尚南冠！

#### 述 怀 两首1945年春

乘风横海但神游，难按雄心冲斗牛。万里烽烟三户恨，廿年涕泪一肩愁。登楼

我自思王粲，读史人谁笑魏收。腐鼠功名偏有味，可怜忙煞烂羊头。

纷浊端宜谢世缘，衡门削迹已年年。沽名有客常怀玉，守义何人不拜钱？绣虎文伶士龙少，思鲈归慕季鹰贤。书生意气应非昔，袖手棋枰未敢前。

### 咏史 三首1945年秋

玉楼几会紫霞杯，凤纸相思检未灰。但得香桃能自寿，何曾黄竹解同哀？掌高欲揽三霄露，鼓急疑闻五夜雷。枉就麻姑买东海，茂陵松柏罨新苔。

叱咤风云气若何！几曾回首及颓波？秦关逐鹿先符讖，楚帐傷雅复听歌。事去徒教虞伏剑，力穷难望鲁挥戈。可怜千里金城地，一例铜驼委绿莎。

芜城日暮乱啼鸦，指点寒烟故相家。壁壘纵教傅頰壤，貔貅空遣丧黄沙。生曾萧氏施三尺，死竟商君厄五车。最是南柯初醒候，东门犬兔漫兴嗟。

### 秋桐 1945年秋

风来败叶舞秋穹，逝水长归东海东。岂有和鸣栖瑞凤？徒将遗响托哀鸿。愁生别馆荒台在，梦醒阿房旧业空。一样飘零白门伴，不堪回首月明中。

### 八载 1945年秋

八载兵戈多难客，今朝闻说九州同。尚疑身在春梦里，不觉眼含欢泪中。一扫愁怀随大白，高歌意气失长虹。低头忽愧黄龙饮，牢落曾无尺寸功。

### 中原 两首 1945年秋

中原喜见风尘静，祇觉旌旄出击迟。挽得银河湔国耻，传将首首当金卮。香花万井欢腾日，松草双陵哭拜时。我亦鸛鷖甘典却，春醪载路待王师。

崩腾胡骑乱秋云，报国何人最矢勤？慨以先锋期一战，羞从前箸论三分。八年汗马闻摧敌，此日黄龙看策勋。但使和戎计无售，风波怎撼岳家军？

### 祝釐 1945年秋

结彩飘灯竞祝釐？神京若个定安危？八年水火悬秦法，一夕衣冠复汉仪。即事尝忧中谷句，感时犹忆少陵诗。南薰曲奏知何日？抱璞趋庭恐未宜。

责任编辑: echo

[发表评论](#)

[查看评论](#)

[加入收藏](#)

[Email给朋友](#)

[打印本文](#)

如果你想对该文章评分, 请先[登陆](#), 如果你仍未注册, 请点击[注册链接](#)注册成为本站会员.

平均得分 0, 共 0 人评分

1 2 3 4 5 6 7 8 9 10